

Iswtêre di drapia



Dêrinne novèle. L' Lîgue Vêlocipêdisse Bêldje n' va (nèn co ?) lès disfinde l' long dês coûsses, minme si ça disrindje ostant lès coreus, lès shûveus ki lès riwêteus si on è nn' d' è ûze avou « intèli-djince » passe k' is trovenut k' ça fait fiêsse sins voye là ddins ène picîye d' politike! Come di djusse, ça n' va nèn kandjî l' djoû k' on va vîre, èto, à rlaye dês drapia avou on cok dissus. Wazèriz wadjî ?

I s' faut sawè coridjî

kand on scrît ène couye. L' pri k' on vos a doné po lîve di l' imprumé AVESPRES n' èst nèn l' bon. Li fayé biyèt ki faut mète èst d' CINK uros èt nèn d' 50 (c' pri là c' èst po l' tirådje à paurt dsus spès papîs, ki c' n' èst nèn co dimwin ki va rèxhe èt k' c' èst bin domaedje). Lès sints djins k' ont dè-djà èvoyî l' gros biyèt vont bèn iêsse con-tint d' polu bistoker famile èt soçons. L' ome dèl posse lzeu va apwar-ter on pa-kèt avou dîj pîces di l' Avèspré.

Dîre k' il a falu 25 ans po voye l' muchîye imaedje dins l' imaedje. Ène bèle



bwêsse d' inglès bicwîts a, dispû c' tins là, dsus s' coviète ène bèle campagnâ rde imaedje. Kan on l' riwête bin, on î pout trover on acoplaedje di djins èt onk di biêsse. C'

èst c' k' on lome li « dsos-c'k' on vwèt-i gn'a d'l' à vîre » (do « subliminal ») On saye vèci di vos è doner on ècsimpe. *Minme k' si l' tâvia vos intèrêsse po z-î mète vos ptîts caurs rabagués d' oute lès frontîres, on s' poréve ètinde... ☺*

Grâce au nucléyêre

èt à dês indyins ki boutenut d' dins, on va bèn rade polu vûdî dês possons d' djus d' banane. C' djane frût là, k' a auddins dl'i 85 % d' euwe, on l' poléve sipotchî sins k' on djus è rèxhe. Asteure, avou ck' is ont trové ça va bèn mia d' aler.

Vos sovnèz-vos dês dragons

k' dins l' tins, avou deus coxhes, on bokèt d' papî, dèl cole di farène èt sakantès twatches à l' keuwe on fyéve voler ? Asteure, i nd' a onk, ki n' èst pus d' papî, a s' èvoler èt pidjote à migote, s' mète à nos agnî l' keuwe èt co pus lon. Lès pris do pètrole, do fiêr, do platène, do blé, do tchèrbon, evd, son-st ocupé à rade griper. L' Tchine è nn' a ausse, s' martchi douve grandes au laudje sès pwates. I vont mia polu nos vînde à ptit pri tos leus clikotias k' ça va fé l' balance por nos avarci po nèn fé raussî l' indècs dês pris. Oyi-da,

ça nos va co bèn rade fé voye dês foutus à l' uxh dês usines ki vont s' mète à discrauchî èt èbager au lon

Soû Emanuyèle vént d' dîre « Dji vwè ostant voltîye ène vwèlêye feume k' iène sins vwèle. » Po m' paurt, dji « clince » ène miète di pus po l' deuzyinme, minme ki ça m' rapauje mès ouy. Nèn vos ?

On n' savéve nèn k' on avéve vèyu si lon k' ça. Vola k' DHL ki fait xhènance di nèn balziner à baguer po Lèpzich. 70.000.000 d' uros (èt c' còp ci sins nos brouyi avou on « 0 » d' trop) d' dringuèle èsse ki ça n' vaut nèn lès pwinnes d' î cotûzer



ène miète ?

Kand on pinse k' i gn' a sakants à dimèrer èfoufî po ène bribe di DLU èt k' on ratind co po voye l' bèn dèl pitite tacse TOBIN.

Dès frâzes k' on n' aréve nèn volu ôre (on n' vos va nèn dîre dins ké « walon » raploû...): « Mi, l' walon, dj' èl sicrît fwârt bèn mins po l' cauzer dj' a deûr. Ène frâze ça va... nèn po taper ène divize. *Amon nos ôtes nos n' èstîne nèn èduké come ça...* » « Vola vosse pri, on sint k' vos porîz fé mia... » « C' est bien de veiller à sauvegarder notre bonne vieille langue, surtout chez lès jeunes... » « Dj' a wangnî on pri. On m' l' a rimètu deus còps èt roviyî d' mète li chèke dins l' bwêsse... » « Vos polèz' chwèzi: d' l' eûwe o do djus d' orandje. N' ratindèz nèn k' on vos rimpliche lès vêres... » « Avoz vèci vèyu

I n' vos faut nèn vos èwarer, on comèle èt maxhe todi lès moudêyes di sicrijhaedje

deus djins a n' awè nén passé oute dès swèssante ans ? »

Lès racauzaedjes da Wêt-A-Ti-Ki-L- Tché-N-Tagne

(a l' après d' ène sakî ki, dispû l' pâdje 12 d' RABULèTS èt, d' bèn lon, on va sayî d' shûre)

Arivé dins l' vile l' pus vijinne do bwès, Wêt-A-Ti-Ki-L-Tché-N-Tagne a trové dsus l' Grande Plaeece on raxhone-mint d' ène pèkêye di djins. On lzeu avéve anonci k' on danseû dsus l' cwade aléve s' î mostrer.

Wêt-A-Ti-Ki-L-Tché-N-Tagne a volu lès atôtchî èt lzeu dire :

« Dji vos va aprinde li mêrome. L' ome è-st-ène brokète k' i faut è passer oute. Avèz fait c' ki faut po z-è passer foû oute ? Djusk' asteure, lès omes ont crèyé ène faflote ki lès dispasse èt vos volèz ièsse li ritoûrnaedje è n' èri di c' grande wache-là èt z' èraler viè l' bièsse pus rade ki d' passer oute di l' ome ?

K' èst-ce ki l' mâ rticot po l' ome ? Ène cacaye po rîre odobin ène onte ki fait mau.

C' èst bèn là c' k' dwèt ièsse l' ome po lès ouy do mêrome, ène cacaye po rîre odobin ène onte ki fait mau ! Vos avèz trévautchî l' voye ki mwinne do wèrbia djusk' à l' ome èt, pa bin dès costés, vos dimèrèz-co molon. L' ôtâyîr vos avèz stî mâ rticot èt, co todi asteure, vos èstèz pus sindje ki l' sindje. L' pus saedje di vos tèrtos n' èst k' on fayè ramoncèlaedje : à mitan ièbe, à mitan grimancyin. Vos a-dj' mauy priyî di divnu spawèta odobin ièbe ?

Vèyèz-m' ci, dji vos aprind l' mêrome. L' mêrome èst l' sins'

RABULèTS 2004 (A n' nén crwêre, s' cinkyinme anêye !) 17

dèl Daegne. Ki vosse volté dije : kl l' mêrome fuche li sins' dèl Daegne.

Di totes mès fwaces dji vos l' dimande, mès frères i vos faut dimèrer tot fidèle à l' daegne. I n' vos faut nén crwêre tos lès cîs ki vos cauzenut d' èspwêr foû dèl daegne ! C' n' èst k' dès èpwèzoneus, k' is l' vos l' muchisse o nén. C' èst dès mèpridjeus dèl vîye, tot èpwèzonés d' zèls minme, is ont l' mora, l' Daegne s' a nauji d' zèls. Is polenut pèter foû èvoye ! Do vî tins ; blastèmer Diè èstéve li pus grand dès blastèmes. Diè a moru èt avou li tos lès blastèmateûs.. Li pus abominâ be asteure c' èst d' blastèmer l' Daegne èt d' doner pus d' pri auzès tripes do nin sititchaebe k' au sins' dèl Daegne. Dins l' tins, l' âme riwètéve li cwârp d' bèn wôt èt adon rén n' èstéve pus hôt ki s' riwètaedje di wôt : Èle li voléve mègue, maulêr à peter èvoye, l' vinte tot vûde ! C' èst-insi k' èle pinséve si chaper, d' li èt dèl daegne ! Ô ! Cit âme èstéve lèye minme co tote mègue, maulêr à peter èvoye, l' vinte tot vûde èt l' cruwauté èstéve li rafiyemint d' cit âme. Mins, vos èto, mès frères, dijèz-m', vosse cwârp, k' annonce-t-i d' vosse âme ? Vosse âme, n' èst-èle nén povrité, mannèsté èt plinne di lèye à fé pitié ? L' vèrité c' èst k' l' ome è-st-on maussî fleuve. I faut ièsse ène Grande Basse po polu sins è nn' èst ièsse mannèt, bwâre on mâ ssî fleuve. Voci dji vos aprind li mêrome, il èst l' basse èwou s' pout s' abumer vosse grand mèprichaedje. K' èst-ce ki vos pout ariver d' pus grand ki l' eûre do grand mèprichaedje ? L' eûre ewou vosse bouneûr li-minme si kandje è disgostaedje tot come vosse rézon èt

vosse vièrtu. L' eûre èwou vos vos dijhèz : « M' boneût n' èst rén ! Il èst povrité, mannèsté èt grandiveuse à fé pitié. M' boneûr duvréve lègitimer lèye minme li vikêriye » L' eûre èwou vos vos dijhèz : « M' rézon n' èst rén ! Èle a ausse di sawè, come li lion d' amougnî ! Èle èst povrité, mannèsté èt grandiveuse à fé pitié. L' eûre èwou vos vos dijhèz : « M' vièrtu n' èst rén ! Èle ni m'a nén co fé piède li tièsse. Dji seû scan di m' bèn come di m' mau ! Tot ça n' èst k' povrité, mannèsté èt grandivaedje à fé pitié. L' eûre èwou vos vos dijhèz : « M' djustisse n' èst rén ! Pont d' ardance è m' vinte. Li djuste èst come ène gayète au rodje ! » L' eûre èwou vos vos dijhèz : « M' pitié n' èst rén ! L' pitié n' èst ki l' crwès k' on î clawe l' cia ki vwèt voltîye lès omes ? Mins m' pitié n' èst nén on clawaedje dsus l' crwès ! » Avèz dèdjà insi djôzé ? Avèz insi mâ y bwêrlé ? Malêureu todi ! si dji vos avéve mâ y oyu insi ûler ! » C' n' èst nén vos pètchîs, c' èst vosse grandivaedje ki bawe conte li cîr, c' èst d' ièsse arâbe, minme dins l' pètchî, ki bwêrle conte li cîr ! Èwou èst l' alumwâr ki vos va ralètchî di s' l' linwe ? Èwou èst l' folîye ki vos fauréve sipritchî au ddins d' vos ? Vola, dji vos aprind l' mêrome : il èst l' alumwâr, il èst l' folîye !

Kand Wêt-A-Ti-Ki-L-Tché-N-Tagne s' adjoké d' djôzer, ène sakî a cryî : « On n' vos a k' tro xhouté cauzer do danseû dsus l' cwade ; asteure fyoz-l' nos vîre ! » Èt totes lès djins d' rîre di Wêt-A-Ti-Ki-L-Tché-N-Tagne . L' danseû dsus l' cwade, pinsant k' on avéve cauzé d' li s'a mètu à l' ovraedje.

(à shûre)

I n' vos faut nén vos èwarer, on comèle èt maxhe todi lès moudèyes di sicrijhaedje